

Viver en dus munds: Militar e circus

Filip Vincenz è il charedatur da la gasetta da circus e varieté svizra

DA CLAUDIA CADRUVI / ANR

■ Sco uffant leva Filip Vincenz d'esser instructor da militar a Thun. Tuttina resta Vincenz insaco fidaivel a ses siemi da pli baud. Bunamain duas giadas l'emna viseta el ina preschentaziun da circus. El è charedatur da la revista «Manege». Perquai vul el savair tge che marscha en ils circus da la Svizra. La «Manege» cumpara sis giadas l'onn e la redacziun fa Vincenz sper ses studi. El studegia scienza militar a la ETH a Turitg. Il studi dura trais onns. Da preschent absolva el il segund onn cun blera pratica. Quai vul dir ch'el ha da far curs militars in pau dapertut en noss pajais.

«Insatge endretg»

Sez na sa regorda el betg pli. Ma ses geniturs raquantan ch'el haja da bolleret gi in grond elefant blau. Ses termagl preferi. Anc oz ha el gugent quest animalet. Gia baud ha Vincenz vuli d'entender clown. L'emprim duai el imprendere insatge endretg, han ils geniturs giavischà.

En il gimnasi ha Vincenz scrit duas lavurs. Ina sur da la musica da circus. L'autra sur dal tractament dals animals da circus e lur sanadad. Il gimnasiast ha observà elefants, chavals ed animals da rapina en plirs circus. Sa chapescha eran tscherts circus plitost reservads e n'avevan betg uschè gugent, sch'insatgi vegniva a fufragnar.

Il resultat da las retschertgas era: Elefants e chavals pon ins tegnair pli u main senza problems en il circus. Da tegnair a moda optimala ils animals da rapina custa dentant bler temp e lavur.

Curt e bun

Naschì ils 12 da december 1975


Creschì si a Steinen (Sviz)

Abitescha a Steinen

Burgais dad Andiastr

Vacanzas da skis a Vella

Animal preferi: Elefant



Tranter militar e circus. Filip Vincenz ha interess divergents.

FOTO C. CADRUVI

Nunspetgadain schef
Entras quests contacts ha Vincenz emprendre d'enconuscher la «Manege». Ella pariva ad el da lez temp betg gist attrattiva. El è s'interessà, sch'el savess forsà scriver artitgels per la revista. Curt sissur ha Vincenz survegni in telefon dal president dal Club d'amis da circus, varieté ed artists. Lez ha dumandà: «Lessas betg gist surpigliar la redacziun da la gasetta da noss club?» Vincenz ha ponderà e pensà «Sche bun, sche fatsch jau quai.»

Quai è succedi il 1997. Dapi ch'el ha enta maun la «Manege» è la gasetta dals amis da circus sa midada fitg. I dat variaziun. Mintg'onn fa in auter artist in maletg per il frontispizi: Rolf Knie, Dimitri, Gaston. Vincenz ha regiuvnà il layout e mess ensemen in nov stab dad umens e dunnas che scrivan per la revista. Uschiglio fa el sco schef tut sez: Ils plans da lavur, tschertgar fotografias, redegger texts, l'editorial e dus enfin trais artitgels per mintga numer.

Il dilemma da schurnalists

Duas giadas ad onn contact cun mintga interpresa da circus e varieté. Quai è la devisa dal charedatur da la «Manege» E quantas interpresas èn quai? I dettia glistas da radund trenta circus e varietés. Vitiers vegnan numerusas pitschnas

gruppas d'artists che tilan dad in lieu a l'auter.

Fin che Vincenz e ses collavurators han visità tuttas interpresas dovra quai bler temp. Il charedatur fa sia lavur senza la minima paja. Gnanca spesas survegnia el. El paja per part las entrada

per las producziuns da circus ch'el scriva criticas surlunder, raquinta Vincenz. Uschia possia el restar independents. I saja numnadamain fitg grev da salvar l'indipendenza en quest metier. Suentar las producziuns sesan ins savens ensemen cun ils artists. Ins vegnia magari prendi si sco en ina famiglia. Tuttina stoppian ins suenter, sch'ins scrivia la critica, restar verdaivels e corrects e numnar las chaussas ch'eran betg bunas. En quest regard saja la glied da circus fitg sensibla.

Cultura da divertiment

Vincenz è uss in expert da circus. Less el anc adina far il clown? Na, quai hajan gia ses geniturs prendi or da chau ad el. El haja pudì guardar davos las culissas. Perquai na sa laschia el betg pli tschorventar da la traglischur. Daco lavura el lura cun tant idealissem per il circus? «Oz fascineschi mai da vesair co ina interpresa sa metta mintg'onn sin viadi cun in program cumpletmain nov», di Vincenz. I saja da smirvegliar che questa furma da viver e questa cultura haja survivi enfin oz. Admirabel saja era ch'il circus vegnia da tegnair la dira en quest temp cun tantas pussaivladads da sa divertir: «Ma insatge sco il circus, che porchas divertiment per l'entira famiglia, stoppian ins tuttina ir ad encurir lunsch enturn.»

Discurrì rumantsch a Cosovo

Filip Vincenz na discurra oz strusch pli rumantsch. Sch'el giaja en vacanzas da skis a Vella, cumenzia el adina puspè a plidar sia lingua materna. Uschiglio ha el retegnientschas. A Cosovo ha el dentant discurrì rumantsch. Vincenz è stà l'onn 2000 sco schuldà en las truppas da la KFOR a Cosovo. Tranter ils 40 000 schuldads eran 140 Svizzers. In da lez era *David Berther* da Rabius. Cun quel haja el mintgant tschantscha il linguatg da la patria.

Il servetsch a Cosovo è stà la raschun che Vincenz è vegnì sin l'idea da studegiar la scienza militar a la ETH. «En Svizra manegia la glied adina che nus stoppian sa turpegiar cun nossa pitschna armada. Ma la cumparegliaziun internaziunala mus-

sa insatge auter.» Vincenz ha vesi a Cosovo co la schuldada dad auters pajais è scolada. El ha fastisà ch'els Svizzers sajan enconuschents per lur qualitads, schizunt tar ils pli auts gremis da la KFOR.

Perquai è el sa decidi da d'entender offizier professional. Gist uss fa el il segund onn da scolaziun. Lez cumiglia blera pratica. L'emprim onn ha el gi da studegiar ciencias umanas sco p. ex. politologia, psicologia, ma era scienza da conflicts, tecnologia militar ed istorgia.

E per turnar anc ina giada a Cosovo. Era là n'ha el betg chalà da far la redacziun da la «Manege». L'onn 2000 èn mintgamai 20 exemplars da la gasetta svizra da circus stads destinads per Cosovo.